

REGLUGERÐ FRAMKVÆMDASTJÓRNARINNAR (ESB) 2020/1474**2021/EES/22/107****frá 13. október 2020**

um breytingu á reglugerð (ESB) nr. 360/2012 að því er varðar framlengingu á beitingartímabili hennar og tímabundna undanþágu fyrir fyrirtæki í erfiðleikum í ljósi áhrifanna af COVID-19 heimsfaraldrinum (*)

FRAMKVÆMDASTJÓRN EVRÓPUSAMBANDSINS HEFUR,

með hliðsjón af sáttmálanum um starfshætti Evrópusambandsins,

með hliðsjón af reglugerð ráðsins (ESB) 2015/1588 frá 13. júlí 2015 um beitingu 107. og 108. gr. sáttmálans um starfshætti Evrópusambandsins gagnvart tilteknum flokkum þverlægrar ríkisaðstoðar ⁽¹⁾, einkum 1. mgr. 2. gr.,

að höfðu samráði við ráðgjafarnefndina um ríkisaðstoð,

og að teknu tilliti til eftirfarandi:

- 1) Samkvæmt reglugerð framkvæmdastjórnarinnar (ESB) nr. 360/2012 ⁽²⁾ telst aðstoð undir tilteknum viðmiðunarmörkum, sem veitt er fyrirtækjum sem veita þjónustu er hefur almenna efnahagslega þýðingu, ekki uppfylla allar viðmiðanirnar í 1. mgr. 107. gr. sáttmálans og er því undanþegin tilkynningarskyldunni í 3. mgr. 108. gr. sáttmálans, með fyrirvara um tiltekin skilyrði.
- 2) Reglugerð (ESB) nr. 360/2012 fellur úr gildi 31. desember 2020.
- 3) Nauðsynlegt er að tryggja fyrirsjáanleika og réttarvissu á meðan mögulegar uppfærslur á reglugerð (ESB) nr. 360/2012 eru undirbúnar, í samræmi við mögulegar uppfærslur á reglugerð framkvæmdastjórnarinnar (ESB) nr. 1407/2013 ⁽³⁾.
- 4) Því ætti í fyrsta lagi að framlengja gildistíma reglugerðar (ESB) nr. 360/2012. Í öðru lagi ætti, í samræmi við viðmiðunareglur um betri reglusetningu, að gera úttekt á reglugerð (ESB) nr. 360/2012 og öðrum reglum um þjónustu í almannáþágu er hefur almenna efnahagslega þýðingu, sem mælt er fyrir um í ákvörðun framkvæmdastjórnarinnar frá 20. desember 2011 ⁽⁴⁾, í orðsendingu framkvæmdastjórnarinnar um beitingu reglna Evrópusambandsins um ríkisaðstoð að því er varðar greiðslur fyrir veitta þjónustu sem hefur almenna efnahagslega þýðingu ⁽⁵⁾ og í orðsendingu framkvæmdastjórnarinnar - ramma Evrópusambandsins um ríkisaðstoð í formi bóta vegna opinberrar þjónustu (2011) ⁽⁶⁾, að svo miklu leyti sem þær gilda um heilbrigðis- og félagsþjónustu. Framkvæmdastjórnin setti af stað úttekt á þessum reglum þegar í júní 2019. Framlenging á gildistíma reglugerðar (ESB) nr. 360/2012 ætti að gera

(*) Þessi ESB-gerð birtist í Stjttíð. ESB L 337, 14.10.2020, bls. 1. Hennar var getið í ákvörðun sameiginlegu EES-nefndarinnar nr. 68/2021 frá 5. febrúar 2021 um breytingu á XV. viðauka (Ríkisaðstoð) við EES-samninginn (bíður birtingar).

(1) Stjttíð. ESB L 248, 24.9.2015, bls. 1.

(2) Reglugerð framkvæmdastjórnarinnar (ESB) nr. 360/2012 frá 25. apríl 2012 um beitingu 107. og 108. gr. sáttmálans um starfshætti Evrópusambandsins gagnvart *minniháttaraðstoð* sem veitt er fyrirtækjum sem veita þjónustu er hefur almenna efnahagslega þýðingu (Stjttíð. ESB L 114, 26.4.2012, bls. 8).

(3) Reglugerð framkvæmdastjórnarinnar (ESB) nr. 1407/2013 frá 18. desember 2013 um beitingu 107. og 108. gr. sáttmálans um starfshætti Evrópusambandsins gagnvart *minniháttaraðstoð* (Stjttíð. ESB L 352, 24.12.2013, bls. 1).

(4) Ákvörðun framkvæmdastjórnarinnar frá 20. desember 2012 um beitingu 2. mgr. 106. gr. sáttmálans um starfshætti Evrópusambandsins gagnvart ríkisaðstoð í formi bóta til tiltekinnna fyrirtækja sem veita opinbera þjónustu sem hefur almenna efnahagslega þýðingu, C(2011) 9380 (Stjttíð. ESB, L 7, 11.1.2012, bls. 3).

(5) Stjttíð. ESB C 8, 11.1.2012, bls. 4.

(6) Stjttíð. ESB C 8, 11.1.2012, bls. 15.

framkvæmdastjórninni kleift að taka tillit til niðurstaðna hæfisprófsins sem einnig tekur til reglugerðar (ESB) nr. 1407/2013. Því ætti að samræma framlengingu á gildistíma reglugerðar (ESB) nr. 360/2012 og framlengingu á gildistíma reglugerðar (ESB) nr. 1407/2013. Þessi framlenging á gildistíma ætti að gera framkvæmdastjórninni kleift að fá heildstæðari mynd af því hvernig mismunandi þættir reglugerðanna tveggja vinna saman. Tímabundin framlenging á gildistíma ætti að veita fyrirtækjum, sem falið er að veita þjónustu í almannabágu er hefur almenna efnahagslega þýðingu, réttarvissu og ekki auka stjórnsýsluálag þar sem bótaráðstafanir, sem fara ekki yfir 500 000 evrur á tímabili sem tekur til þriggja rekningsára, sem veittar eru fyrirtækjum sem veita þjónustu í almannabágu er hefur almenna efnahagslega þýðingu, munu áfram ekki teljast ríkisaðstoð.

- 5) Því ætti að framlengja gildistíma reglugerðar (ESB) nr. 360/2012 um þrjú ár, til 31. desember 2023.
- 6) Í ljósi þeirra efnahagslegu og fjárhagslegu afleiðinga sem uppkoma COVID-19 hefur haft á fyrirtæki og til að tryggja samræmi við almenn stefnumarkandi viðbrögð sem framkvæmdastjórnin hefur samþykkt, einkum á tímabilinu 2020-2021, er nauðsynlegt að fyrirtæki sem lent hafa í erfiðleikum vegna uppkomu COVID-19 uppfylli skilyrði fyrir aðstoð samkvæmt reglugerð (ESB) nr. 360/2012 í takmarkaðan tíma.
- 7) Því ætti að breyta reglugerð (ESB) nr. 360/2012 til samræmis við það.

SAMÞYKKT REGLUGERÐ ÞESSA:

1. gr.

Reglugerð (ESB) nr. 360/2012 er breytt sem hér segir:

- a) Eftirfarandi 2. mgr. a bætist við 1. gr.:

„2a. Þrátt fyrir h-lið 2. mgr. skal þessi reglugerð gilda um fyrirtæki sem áttu ekki í erfiðleikum 31. desember 2019 en lenda í erfiðleikum á tímabilinu frá 1. janúar 2020 til 30. júní 2021.“

- b) Í stað annarrar málsgreinar 5. gr. kemur eftirfarandi:

„Hún gildir til 31. desember 2023.“

2. gr.

Reglugerð þessi öðlast gildi á tuttugasta degi eftir að hún birtist í *Stjórnartíðindum Evrópusambandsins*.

Reglugerð þessi er bindandi í heild sinni og gildir í öllum aðildarríkjunum án frekari lögfestingar.

Gjört í Brussel 13. október 2020.

Fyrir hönd framkvæmdastjórnarinnar

Ursula VON DER LEYEN

forseti.